

**BOSNA I HERCEGOVINA
FEDERACIJA BOSNE I HERCEGOVINE
Tuzlanski kanton
GRAD TUZLA
GRADSKO VIJEĆE**

S T E N O G R A M

**S VANREDNE SJEDNICE GRADSKOG VIJEĆA TUZLA ODRŽANE 20. AVGUSTA
2015. GODINE U MALOJ SALI BOSANSKOG KULTURNOG CENTRA S
POČETKOM U 9,30 SATI**

- SJEDNICI PRISUSTVUJE 27 VIJEĆNIKA

U Tuzli, avgust 2015. godine

JOZO NIŠANDŽIĆ – predsjedavajući Gradskog vijeća Tuzla

Poštovani vijećnici, poštovani gospodine Gradonačelnice Grada Tuzla, predstavnici gradskih službi, boračkih i nevladinih organizacija, članovi savjeta mjesnih zajednica, predstavnici sredstava javnog informisanja, poštovani predstavnici Gradskog i prigradskog saobraćajnog preduzeća, dragi gosti, dame i gospodo.

Otvaram prvu vanrednu sjednicu Gradskog vijeća Grada Tuzla.

Konstatujem, da prema evidenciji Stručne službe Vijeća, sjednici prisustvuje 27 od ukupnog broja vijećnika, što je dovoljno za punovažan rad i odlučivanje.

Današnjoj sjednici nisu prisutni gospođa Nada Mladin, Elvir Kasumović, Jasminka Mijatović i Mehmed Mujić. Predlažem da im opravdamo odsustvo.

Odredbom člana 60. Poslovnika Gradskog vijeća Tuzla, propisano je između ostalog slijedeće:

“U hitnim slučajevima, predsjedavajući Vijeća može da sazove vanrednu sjednicu Vijeća u roku kraćem od 8 dana, a dnevni red za ovu sjednicu da predloži na samoj sjednici.

Predsjedavajući Vijeća će obavijestiti Vijeće o razlozima hitnosti zakazivanja sjednice.”

Podsjećam prisutne i javnost, kako su 27. 07. 2015. godine organi Gradskog i prigradskog saobraćajnog preduzeća donijeli odluku o povećanju cijena autobuskih karata na pojedinim lokacijama, te cijena mjesečnih karata za javni prijevoz za pojedine kategorije, među kojima su učenici, student i penzioneri, što je izazvalo opravdano nezadovoljstvo građana.

Moramo istaći, kako je ovo povećanje cijena izvršeno, a da se nije postupilo prema članu 21. Zakona o komunalnim djelatnostima Tuzlanskog kantona, koja obavezuje davaoca komunalne usluge (u konkretnom slučaju Gradsko i prigradsko saobraćajno preduzeća d.d. Tuzla) da kod svake korekcije cijena pribavi predhodnu saglasnost općinskog, odnosno gradskog vijeća, što u konkretnom slučaju nije učinjeno.

Gradsko vijeće Grada Tuzle i Gradonačelnik su formirali Pregovarački tim, koji je imao zadatak, da kroz razgovore sa predstavnicima Gradskog i prigradskog saobraćajnog preduzeća d.d. Tuzla, iznađe na zakonu zasnovano rješenje, koje bi bilo u interesu građana i javnom interesu, a ne bi ugrozilo poslovanje GIPS d.d. Tuzla.

U tom smislu zasjedali su Kolegij Vijeća pet puta, Komisija za ljudska prava i slobode pet puta i Komisija za statutarna pitanja i propise.

Gradonačelnik je u toku jučerašnjeg dana, potpisao u ime Grada Tuzla Sporazum sa d.d. Gradski i prigradski saobraćaj Tuzla, koji mi je dostavljen jutros i podijelili vijećnicima.

Na kolegiju Gradskog vijeća Grada Tuzla, dogovorili smo se da održimo današnju sjednicu, kako bi smo se dogovorili oko daljih aktivnosti i donijeli odgovarajuće zaključke. Pročitat ću kasnije te zaključke.

Za današnju vanrednu sjednicu predlažem slijedeći

DNEVNI RED

RAZMATRANJE INFORMACIJE O PROBLEMTICI JAVNOG GRADSKOG PRIJEVOZA NA PODRUČJU GRADA TUZLA, NASTALE U POVODU NEZAKONITOG POVEĆANJA CIJENA OD STRANE ORGANA GIPS D.D. TUZLA I PRIHVATANJE SPORAZUMA IZMEĐU GRADA TUZLE I GRADSKOG I PRIGRADSKOG SAOBRAĆAJA TUZLA

Pitam vijećnike ko je za ovakav dnevni red, molim da digne ruku? Ko je za, molim da digne ruku? (26) Ima li neko protiv? (Nema.) Uzdržan? (Nema.)

Konstatujem da smo jednoglasno usvojili predloženi Dnevni red u cjelini:

RAZMATRANJE INFORMACIJE O PROBLEMTICI JAVNOG GRADSKOG PRIJEVOZA NA PODRUČJU GRADA TUZLA, NASTALE U POVODU NEZAKONITOG POVEĆANJA CIJENA OD STRANE ORGANA GIPS D.D. TUZLA I PRIHVATANJE SPORAZUMA IZMEĐU GRADA TUZLE I GRADSKOG I PRIGRADSKOG SAOBRAĆAJA TUZLA

Sada prelazimo na realizaciju dnevnog reda:

Pozivam Gradonačelnika u svojstvu rukovodioca Pregovaračkog tima podnese informaciju toku razgovora i o samom Sporazumu. Gospodine Gradonačelniče izvolite.

JASMIN IMAMOVIĆ – Gradonačelnik Grada Tuzla

Dame i gospodo vijećnici, poštovani gosti, od svega, dakle i uvijek je najvažniji interes građana i najvažnija je ustavnost i zakonitost.

Meni je zadovoljstvo da mogu kazati da su se cijene od jutros, dakle od danas, da su cijene jutros vraćene na nivo prije poskupljenja.

Dakle hoću da se zahvalim predstavnicima GSP-a što su već i prije sjednice ovoga Vijeća pristupili realizaciji Sporazuma kojeg smo potpisali sinoć.

Rezultat je to rada i truda građana, mnogi su dolazili i razgovarali sa mojim saradnicima i sa mnom, savjeta mjesnih zajednica i moram kazati prije svega onih koji donose odluku. Dakle Kolegija ovoga Vijeća i komisija ovoga Vijeća. Evo jutros je bio peti Kolegij na istu temu. Službi Općine je zasluga to i zasluga je to i GSP-a.

Dakle Kolegij pet puta, jutros peti put je zasjedao. A moji saradnici i ja i predstavnici GSP-a vjerujte nisam brojao. Dakle hajde da kažem više od pet puta.

Zahvaljujem svima na želji i potrebi da se postigne kompromis. Dakle i da se uvijek ima u vidu i želja građana i uvijek ima u vidu zakon.

Evo cijene su vraćene. Službe će morati jer ima i tu dosta zaostataka od strane službi koje treba sustići. Neprekidno i na realizaciji Sporazma i na realizaciji Sporazuma. Dakle nama će glavna pažnja biti kad su u pitanju javna preduzeća ili pružanje javnih usluga ovo u naredna sigurno dva mjeseca.

Samo dakle rad, zakon i želja da naši građani imaju najpovoljniju moguću cijenu i najbolju moguću uslugu. I samo zakon i Ustav.

Ja se zahvaljujem Kolegiju Vijeća na podršci, zahvaljujem se i dakle GSP-u na razumijevanju. Nema ništa bolje nego kada se kompromis postigne. To je dakle saglasnost volja svih nas.

Predlažem da Vijeće da podršku ovom Sporazumu i da idemo svako za svojim poslom. Hvala.

JOZO NIŠANDŽIĆ

Hvala gospodine gradonačelniče. Evo čuli smo što kaže rezime i Sporazum imamo pred sobom. Mislim da smo ga uspjeli svi pročitati.

Ako nema diskusija možemo li zaključiti da izjasnimo se, da se izjasnimo se, izjašnjavamo se znači o predlogu.

Molim vas ja predlažem da donesemo sledeće zaključke u kome će biti sve. Pa da čujemo molim vas.

1. Podržava se Sporazum o uređenju međusobnih odnosa, potpisan između Gradonačelnika Grada Tuzla u ime Grada Tuzla i Uprave društva d.d. Gradski i prigradski saobraćaj Tuzla u ime Gradskog i prigradskog saobraćaja d.d. Tuzla.

2. Podržavaju se zaključci usvojeni od strane Kolegija Gradskog vijeća Grada Tuzla i komisija Gradskog vijeća (Komisije za ljudska prava i slobode i Komisije za statutarna pitanja i propise.) donesene u vezi sa odlukom o povećanju cijena javnog gradskog prijevoza od strane Gradskog i prigradskog saobraćajnog preduzeća d.d. Tuzla.

Pitam vijećnike ko je za ove zaključke, molim da digne ruku? (25) Ima li neko protiv? (Nema.) Suzdržan? (Nema.)

25 vijećnika je glasalo za, niko nije bio protiv ni suzdržan, te konstatujem da su jednoglasno usvojeni sjedeći zaključci:

1. Podržava se Sporazum o uređenju međusobnih odnosa, potpisan između Gradonačelnika Grada Tuzla u ime Grada Tuzla i Uprave društva d.d. Gradski i prigradski saobraćaj Tuzla u ime GIPS d.d. Tuzla.

2. Podržavaju se zaključci usvojeni od strane Kolegija Gradskog vijeća Grada Tuzla i komisija Gradskog vijeća (Komisije za ljudska prava i slobode i Komisije za statutarna pitanja i propise.) donesene u vezi sa odlukom o povećanju cijena javnog gradskog prijevoza od strane Gradskog i prigradskog saobraćajnog preduzeća d.d. Tuzla.

Mislim da se predstavnik Gradskog saobraćajnog preduzeća bio javio da se. Izvolte. Gospodin Fuad Đulović, izvršni direktor Gradskog i prigradskog saobraćaja d.d. Tuzla. Izvolte gospodine Đuloviću.

FUAD ĐULOVIĆ – izvršni direktor d.d. GIPS Tuzla

Hvala lijepa gospodine predsjedavajući. Dame i gospodo ja želim srdačno da vas pozdravim i želim da vam kažem da smo u proteklom periodu intenzivno radili znači oko ovog Sporazma.

Imali smo znači puno razumijevanje Gradonačelnika, gradskih službi, puno razumijevanje komisija pri Gradskom vijeću i puno razumijevanje predsjednika klubova stranaka koje participiraju u ovom Vijeću jer smo već i ranije razgovarali o ovim stvarima.

Još jednom vam se najiskrenije zahvaljujem na podršci koju ste nam pružili i želim samo da kažem da će Gradski i prigradski saobraćaj sa svoje strane u potpunosti poštivati odredbe ovog Sporazuma i da naglasim da smo i u budućem periodu znači apsolutno otvoreni za saradnju i da komunalnu oblast javnog prevoza putnika u skladu sa pozitivnim zakonskim propisima podignemo na jedan viši nivo i da naši građani, naši cijenjeni putnici budu zadovoljni. Hvala vam još jednom.

JOZO NIŠANDŽIĆ

Hvala gospodine Đuloviću. Ja sa ovim završavam vanrednu sjednicu Gradskog vijeća. Hvala. Živjeli.

(S obzirom da je dnevni red iscrpljen predsjedavajući Gradskog vijeća Tuzla zaključio je rad sjednice Gradskog vijeća Tuzla u 10,40 sati.)

STENOGRAM SAČINIO

Igor Kurcinak

P R E D S J E D A V A J U Ć I

Jozo Nišandžić, s.r.